

## 菜市仔

陳沛彤

猶會記得細漢的時，阿媽個兜樓跤就是菜市仔，逐擺只要我轉去，透早就會予人喝賣的聲吵起床，我若跣起床，阿媽就會招我做伙去買菜。伊講若較早去市場，就有較濟物件通好揀，買著的肉嘛較嬌，毋免買別人揀賸的。

菜市仔真鬧熱，除了青菜、魚、肉佱果子，市場嘛會賣一寡仔較傳統的喙食物仔。我誠愛躉菜市仔，尤其是佱阿媽做伙，除了逐擺攏會有好空的以外，伊嘛會教我按怎揀夠分的果子或者是當咧大出的青菜。阿媽閣共我講，買菜就是愛會曉佱頭家盤擱，毋管有共頭家買物件無，攏愛相借問。頭家心情若好，你共買物件無的確就會算你較俗，順絀閣送你幾瓣仔蒜頭。

我感覺阿媽誠厲害，菜市仔內底有誠濟頭家攏咧賣仝款的物件，我就問阿媽：「你是按怎去記遐的頭家賣啥物？」阿媽講伊攏用頭家的特色去記，親像賣青菜的有掛目鏡，就會叫伊「目鏡的」；賣果子的頭家見著人攏無愛笑，就叫伊「臭面的」。有一擺阿媽叫我去菜市仔買菜，魚仔佱豬肉攏愛共阿梅買、青菜去共目鏡的買。去到賣豬肉的阿梅遐，我就共講阿媽叫我來買豬肉，順絀問看伊有咧賣魚仔無。頭家笑笑仔講：「小姐，阮遮無咧賣魚仔。」我緊共頭家會

失禮，毋過愈想愈奇怪，敢講賣魚仔佱賣豬肉的阿梅是無仝人？尾仔阿媽看我無買魚仔轉去，伊才想著伊無共我講個兩個是無仝人，賣魚仔的叫「阿玫」，是玫瑰的玫；賣豬肉的叫「阿梅」，是梅花的梅。

綴阿媽去菜市仔的時間若倚晝，阮兩個大粒汗、細粒汗，腹肚嘛枵矣，阿媽就煮我去食礲冰。礲冰一下捧來，我佱阿媽一人一喙，拄才買菜的辛苦袂輸綴冰做伙消散去，毋但食甲透心涼，閣食著一種幸福的滋味。

阿媽這馬愈來愈有歲矣，自從阿媽搬厝了後，已經誠久毋捌佱阿媽做伙躉菜市仔。逐擺佱阿媽開講，若是講到遮，阮攏會足歡喜，頭殼內攏是較早阿媽牽我的手，做伙躉菜市仔佱食冰的畫面。希望以後有機會，會使換我煮阿媽去躉菜市仔。